

括

異

志

括異志卷第四

棄國張 師正 纂

陳省副

慶曆初陳吏部洎自三司副使謫守鍾離郡比曹貲外錢愚時為通倖錢善數術一日俾其邑封具酒肴悉召陳宅之長幼會于倖居明日錢詣陳謝曰昨日以菲薄奉邀貴眷者耶示區之意以託後事爾陳大驚曰足下四體甚安此言何謂也錢曰明年正月某日某當死乞護送

諸孤歸京師故樓則幸甚陳知錢善數術亦
不以為然愚嘗謂其妻子曰陳亦行尸耳過明
年復舊官則不可矣明年正月如期而卒月餘
陳徙廬州未半歲復召為三司副使數月病背
疽而死越三日陳有少女奴年十二三忽據榻
附而降語曰吾昨日已見王將設酒我辭以創
痛而止門外從者五十人悉戴漆皮弁衣皂綠
緋寬衫烏氈靴亦無異人世不復號慕以自苦
也又數日復降語命設榻如賓主位曰此前濠

州同官錢比部也吾今得知益州復與比部同
官前日已嘗宴會相得之歡不異平昔可令院
子傳語錢家縣君言比部教善視十一郎比部
幼子最所鍾愛者今再與陳吏部同事甚樂勿
思念悲慟也先是二日錢之幼女方十餘歲睡
中哀號呼之良久乃寤曰我見比部與陳吏部
在——高堂上宴會樽俎鬯懽無不華醑左右
侍衛甚盛因念父已去世不覺啼泣被呼方省
與陳宅女奴降語相符昔之小說載幽冥事者

多云人間郡縣陰府悉同若陳吏部之爲益州
豈其然乎比部之子閑今爲供備庫副使言之
甚詳

王待制

天章閣待制平晉王公質之謫守海陵也郡之
監兵治宇之西偏有射堂堂之前藝蔬爲圃一
日晨興治圃卒起灌畦見一老媪立射堂中氣
貌甚假卒驚詢之媪曰我乃監兵之母也汝亟
白我在此卒曰監軍不聞有母媪何妄也媪曰

弟告無多詰卒入白監軍遽出視之姿狀音息
真母也而言語哀惻監軍號慟家人已下皆往
拜侍母急曰以幕幕射堂之軒使不外矚旣而
詢其所從來母曰冥中有一事應未受生與見
伏牢者皆給假五日我獨汝念是以來耳監軍
遽謁告且白平晉公平晉公朝服往拜而以常
所疑鬼神事實之皆不對曰幽冥事泄其罰甚
重無以應公命平晉又問世傳有閻羅王者果
有否復誰尸之曰固有然為之者亦近世之大

臣也請其名氏則曰不敢宣于口公乃遍索家藏自建隆以來宰輔畫像以示之其間獨指寇萊公曰斯人是也復問冥間所尚與所惡事荅曰人有不戕害物性者冥間崇之而陰謀殺人其責最重如是留五日遂去或云平晉由此不復肉食平晉嘗為之記其子復以示魏泰云

石比部

比部外郎石公并言皇祐中始得大理寺丞監并州之徐溝鎮歲餘夢一鬼朱髮青膚自中霄

下瞰垂臂捽一女女子髮自地而出謂之曰送
汝往李專知家作女石驚覺心悸遽不寐逮曉
時有酒稅場官姓李者石因問爾昨夕有何事
李曰四更初息婦生一女子石歎異久之其後
嬰兒有疾召一姥視之曰本太原人隨夫寓此
僅四十年凡官於此者無不出入其家此廨宇
亦曩日都監之官舍徐溝舊差班行監當今差
京官今中雷之下者嘗有并李殿直監臨日鞭
一女使不勝楚痛投井而死遂廢不汲仍遭大

水湮焉石愈驚駭方省前夢之驗也

曹郎中

曹金部元舉治平中嘗為福建路轉運使廨宇
中有池亭曹朝夕止於是家人怪其肌體日瘠
精神恍惚訊之即曰嘗有李家娘子甚美與二
婢子來侍我咸謂物怪所惑召醫巫視之悉無
効乃涸池求之得三鱉一大二小曹遽呼曰勿
害李家娘子遂鬻而焚之曹亦謝病歸維陽歲
餘卒

陸龍圖

龍圖陸公詵尹成都日府宅堂前東南隅有大
枇杷一株其下夜則如數女子聚泣者燭之則
無所見厥後半歲陸卒於位熙寧六年成都關
關間遇夜邏卒聞哭聲呦然凡數十處就
視之則無有至七年八年大旱殍餓盈路繼之
以疾疫死者十六七洎至秋麥則無人收刈至
於綾羅紗錦練箋諸物鬻者亦少宜乎鬼兆之
先見也

丁都官餽目覩

宋中舍

太子中舍宋傳慶諫議大夫太初之子自言其
父性嗜鱉嘗一日得數鱉付厨婢臠之其一甚
大婢不忍殺放之溝中逾年婢病疫疾苦心煩
熱殆將卒家人舁致外舍婢卧以俟終翌日視
之則自戶間至婢胸脅間皆青泥塗漬婢亦稍
聞訊之則云不究其泥之來但煩熱減差耳家
人伺之逮夜有一大鱉自溝中被體以泥直登
婢脅冰之婢逾旬遂愈詢其致鱉之自婢乃述

其本末天聖中傳慶為遂寧通守與先君言如此

馬文思

文思副使馬公仲方尚書亮之姪也遇罷官多寓家高郵軍細君之妹亦居是邑嘗以牝羊饋於公未幾生一羔秣飼數月閑居患無人牧放乃鬻於屠肆翌日臨格將烹之出刀于側且瀹水以脩燂濯將剗而亡其刀良久見其靬於溝中取而洗拭置于床旋又失之乃羊所生羔銜

而投諸溝又以足踐淖使勿見屠者視之大感傷後以羊歸馬氏自此不復屠羊公亦以羊施佛寺公嘗守全州嘗自書斯事于閱理堂之壁云

陳太博

太常博士陳公舜俞在明州觀察推官有二子一男一女皆六七歲一日戲嬉于外逮歸則男子面有墨規其左頰女子朱規其右頰家人怪問其所規之自則云不知家人但謂小兒戲而

為之命滌去翌日復然如是幾月餘日日如是而無他怪陳慮為怪之漸也白轉運使求泣他局遂泐牒于浙西解既空郡給二皂以守舍一日二人相與言曰陳察推向以二兒面有畫以為怪而竟無他我等當驗之有能獨入堂中自朝至暮者醵錢若干以賞之一皂欣然携短劍入堂之西序醉卧牖下及醒日已過午吏喜其無怪又喜將獲所賞也徘徊伺晚而出俄然堂扉啓有數婢從一婦人臂鸚鵡立堂之庑若所

規畫然吏熟視默念曰苟怪止如是亦何足畏
方將以刃却之忽心動若大憚不知其身之所
有驚呼携劍突向以走犯譙門穿長街若發狂
失心者市人覩其持劍以為有變皆恐避之未
半里廢路道左衆擁起奪劍而詰之移刻始能
言竟不知其何怪也
進士魏泰遊明州親見
此事

馬仲載

熙寧六年開江南為郡縣既得峽州築為安江

城命內殿承制馬公仲載統卒三百戍焉時石鑑以兵馬鈐轄知辰州總千兵亦駐城中一夕邏卒云蠻兵數千夜當攻城石聞之即欲遁去馬曰鈐轄儻出則誰與守遂仗劍於門令曰敢出者斬石遂留蠻兵亦不至由此石頗銜之未數月馬忽仆地懵然無所知僕從乃舁辰州就醫藥石乃効其棄城戍將以軍令裁之馬病稍間就鞠于武陵乃具饌遙訴司南岳翌日有稚子方十歲未嘗讀書忽睡中呼索紙筆乃書曰

南岳門下牒勅馬仲載念卿遙祭之專勤聽其
訴聲之懇切據卿之罪理當喪命上天愍卿常
行吉心能守所職止命降災奪官更宜省循以
邀福壽懋哉幸矣熙寧六年十一月二十四日
復取朱筆畫一印於日月上篆文亦不可辨兒
復睡少還而寤詰之云有一人青巾黃衫以黃
勅付我亦不知其手自摹寫也仲載之事武陵
人無不知者南岳勅好事者多錄而藏之

夏著作

尚書郎高公靖蔡州人罷官歸鄉里村居嘗坐
壠上視農事有耕夫於土壤得鐵牌上有大字
云司法叅軍夏鈞高亦不喻數年授知道州相
次有長沙人夏鈞調本州司法叅軍高乃悟鐵
符之前定也鈞官至著作佐郎

集秘丞

集秘丞膺皇祐中知河南府緱氏縣代人將至
預徙家于洛城獨止于縣之正寢一夕夢二女
子再拜於榻前問其所以云妾等是前邑尹家

女奴也以過被鞭死瘞于明府寢榻之下向來
宅眷居此不敢妄出恐致驚怛今夕方敢誠告
乞遷于野乃幸之大也異可之明日發其地果
得二枯骨紅梳綉履尚在命裹以衣絮祭以酒
飯加之楮錢埋於近郊數夕後夢中前謝而去
樂長官浩言之

梁寺丞

梁寺丞彥昌相國之長子也嘉祐中知汝之梁
縣其內子嘗夢一少年黃衣束帶紗帽神彩俊

爽謂之曰君宜事我不爾且致禱旣寤白梁梁
不之信旣而竊其衣冠簪珥掛於竹木之杪變
怪萬狀梁伺其嘯拔劍擊之鬼曰嘻汝安能中
我又命道士設醮以禳之始勅壇奪道士劍舞
於空無如之何謂梁曰立廟祀我我當福汝旣
困其擾不得已立祠于廨舍之側又曰人不識
吾面可召畫工來我自教之繪事旣畢乃內子
夢中所見者會家人有疾鬼投藥與之服輒愈
歸之政事有不合於理者泊民間利害隱匿亦

密以告梁解官廟為後政所毀鬼亦不靈

開

之洪正卿進士云

楊郎中

郎中楊公異性好潔靜過甚不近人情寓居荆南對門民家有子數歲膚髮悉白俗謂社公兒異惡焉屢呼其父與五緡令殺之民得鏹潛徙去楊止一子俄病癰肌潰而卒近時有人死而復生云陰府新立速報司若楊氏之報信哉

張太博

治平三年太常博士張忘其名知兗州奉符縣
太山廟據縣之中令兼主廟事歲三月天下奉
神者悉持奇器珍玩來獻公往、竊取之既解
官竊家於東平一夕聞中闔外如數十人語聲
雜還不可辨晨興視之其所盜鬻幙器皿之類
悉次第羅列於廳廡間視橐篋封鐫宛然如是
者凡數夜張大怖駭悉取燔之越三日奉符舊
事發兗州獄吏持檄來捕既就逮左驗明白竟
寘牢戶

楊從先

殿直楊從先至和初監大名馬監其冬夢授樞
密院劄子云千里重行行右劄付從先准此既
覺不喻其旨明年春大雪牧馬多死監牧使臣
衝替者數人乃悟千里重字也以配行衝字也
再言之者皆被責也

括異志卷第五

襄國 張 師正 纂

李叅政

李叅政至性修潔夷淡年幾強壯尚為布衣開
羅中有省郎典齊安郡至依門下為學讀書著
文夜分不寐一夕有二女子盛冠服鳴珮璫揖
李而坐容態殊麗風度婉約李恍不知其所從
來因定神肅容熟視而問曰鬼邪仙邪荅曰奴
非鬼也乃仙之流亞也少時出戶不見自此月

三至或飲之以酒或啜茗而去談幽顯之事辭
簡而理明守將受代二女復來謂李曰與君歟
奉三年於茲矣見君居常以禮自持未省一言
及亂器識洪厚終當遠到然君前世曾為商賈
負人息錢甚夥以貧不能償故今世俾君羈蹇
於壯歲因出書一封與至曰俟改元太平乃啓
不爾當有禍旣而太宗踐祚改元太平興國
啓其封見太平興國二年李至第二人及第旣
而果然後歷清顯入叅大政擁旄巨鎮而終

樂京著作嘗言

梅侍讀

侍讀梅公詢端拱二年第進士清裕有才早廁
文館坐在人泊滯者數十年景德中嘗夢與一
士人年甚少共射一石牛梅中脅少年者中首
至祥符中真宗東封詢被選於太平頂行事
宿齋其上是夕燭香再拜默祈將來通塞之事
既寢夢牛馬羊布野有二牛闘于前一人被冠
服前謂牛曰伺呂公再入中書闘亦未晚牛遂

解去其後自尚書郎帶職知濠州呂申公以太
常博士通守郡事儀狀酷似向夢中所見又守
倅之居苑圃中各有一小石牛梅因省前夢厚
結於申公竊元中呂公入相擢梅爲天章閣待
制其後申公自北都再持政栢梅已爲樞密直
學士判審官院又遷爲侍讀學士郡牧使是歲
十二月得疾出守許州以至捐館夢中所見牛
馬乃郡牧使也二牛鬪者其年歲直丑十二月
又丑也二牛者逢二丑而疾作也神先告之矣

評曰君子居易以俟命語曰富而可求也雖
執鞭之士吾亦爲之明富貴貧賤以時而來
不可規圖而取梅公早預俊選屯蹇不振年
始從欲方遇知己官歷兩省職居禁近擁旄
巨鎮克享遐齡始否終泰豈非命耶

韓宗緒

韓宗緒龍圖贊之子以父任補將作監主簿皇
祐秋鎮廳預薦偶於相國寺資聖閣前見其家
舊使老僕呼謂曰若非某乙乎死久矣何得在

此曰某今從送春榜使者又問榜可見乎曰有
司收掌甚密不可得而見也又謂曰汝能密詢
有我姓名手苟無亦可料理否僕許諾試為盡
力又問復於何處爲約僕云復期于此他處難
庶某之迹此地雜沓人鬼可得叅處他日如期
而往僕果在焉遂開掌見己之名在片紙上揭
其下乃田寶鄰也僕曰此人明年當登第官甚
卑郎君亦自有科名但差晚耳况身已有官故
得而易之若白身則不可因忽不見明年韓登

第曾以茲事說於親舊間治平中韓玉汝龍圖
與供備庫使段繼文同使契丹至雄州段嘗為
雄之監軍雄之舉人皆上謁田竈鄰刺字厠焉
韓見之大驚與段盡道所以段復以韓事本末
語之曰遂齋戒夜黜作奏訴于帝本炎嘗侍父
官瓦橋備知之熙寧中炎登第為岳州巴陵簿
縣令王澤嘗談怪異王云應舉時郴州東有一
人常入冥言人吉凶甚驗遂率同人數輩就問
之其人在小邸暗室中既見遂以將来得失叩

之再三不語俄又面壁而坐云田竈鄰公事至今未了安敢有他科場事不知田竈隣何人也
炎方省向者韓段之言竈隣以累舉特奏名其
後官甚卑

南州壬子

虞部負外郎杜公彬罷滁倅至闕奉朝請一日
遊景德寺訪朝客不值方假筆札以誌向偶狂
僧嚴法華者自廬下直揖杜君杜雅聞法華言
事多中因以平生未然之事諮之僧奪筆索紙

杜以刺字之餘授之大書云南州壬子杜不測
其旨後數月授知漳州到州閱圖經則陳氏偽
據目目漳爲南州杜嘆訝之自撰以爲壬子者
有土之號豈隱其爲州之意一耶後歲餘杜終
於任其子煜用浮屠法作七齋飯僧次煜因言
及法華之事取其書以示群僧因觀其壬字中
一畫差長若壬一字遂以甲子推杜君卒之日
正壬子也其子煜言之於魏泰并出其書

李侍禁

李侍禁齊善袁許之術士大夫多喜之有別業
在華陰之東郊其妻先卒買一妾生二子一男
一女李旣死二子始髻鬣長男年二十餘乃嫡
室所出與其妻謀曰二子長立當有婚嫁之費
且分我資產能致之死地家資悉我有也自此
二子衣不得完食不得飽笞罵挫辱無日無之
俄得疾疫遂絕其藥膳雖杯水亦不與相繼皆
物故妾不勝怨憤日走伏齊壙號哭以訴數月
妾亦死有隣家子於閭巷見齊手携二子妾亦

侍側顧謂鄰家子曰我長男不孝不友虐殺弟
妹又令此妾銜恨而歿若可語之吾亦訴於陰
府不汝置也隣家子知是鬼將走避因忽不見
隣家子遽來告之亦不之信一旦其妻具酒肴
會親舊女客於中堂厥良獨坐書閣下乃父自
外至數其罪以杖擊之坐客聞其號呼悉往視
但見仆地叩頭服罪言虐殺二子狀數日乃死
其妻後數月亦死田宅家貲悉籍沒噫李齊之
事不誣矣世之人父死而謀害幼稚以爲貨賄

者多矣目覩數族雖不若李為兒靈但見其身
大折子孫淪胥以至無立錫之地李齊之事足
使狠子庸婦聞之少警其心 董職方經臣親
見茲事云

李氏婢

賈國傳大冲嘗說有李某屢典郡旣卒家人歸
京師舊居有老婢乞京城巷陌無不知者家之
貿易飲膳衣著洎親家傳導往來悉賴焉邑君
愛之如兒姪明道春方淘溝俾至親家通起居

抵暮不歸數日尋訪無迹邑君曰是媼苦風眩
疾作墜溝死矣即命諸婢設靈座祭焉家之吉
凶亦來報邑君泣曰是媼雖死不忘吾家明年
春自外来家人皆以爲鬼也媼拜曰去歲令妾
傳語某人至某處風眩作墜溝中某人宅主姥
見之令人極出滌去穢污加以藥餌得不死某
誓傭一年以報今旣薨即辭歸往詢某氏果然
是夕有青巾男子見邑君夢曰我清衛卒也向
死于巷左昨聞宅上失女使設位以祭遂假其

名竊享焉今聞已歸乃拜辭而去

李比部

李比部從周景祐四年隨鄉書來京師與數
同人僦舍於麻籍巷嘗五鼓而興將謁親知于
遠坊者始啓寢戶即蹈于地奴僕扶視氣息殆
絕至巳午間始惺然曰初啓關見一鬼戴短巾
衣綠寬衫黝面于顙狀若祠廟中所謂判官者
以氣噓之如霜風之切骨遂昏然亦不知委頓
於地也明年校藝不利於南宮

胡殿丞

胡殿丞偃潭州人至和中授峽州簽判待闕荆
州僦居於公安門內暇則坐於廳庀間嘗有持
刁鐻者比日過門植足注視良久乃去胡異之
一日呼與小兒剃髮因問曰汝常顧吾門內何
也曰有一親識姓某在峽州為吏兼管冥曹事
多而身勞欲公垂庇是以日踵門而不敢言胡
未之信及至任聚群胥出姓名問之有一人前
曰刁鐻漢竟多口胡屢詢以冥司所職但云未

可輕洩居無何胡以先人忌晨飯僧課經具疏
焚楮泉迨明日其吏至案前以手就懷探昨日
所焚疏示若新寫者已而灰滅且曰殿丞見迫
不敢隱然某已得罪而殿丞亦不免減祿筭矣
數日吏暴卒暮年胡以病廢於家 得之李林

秘校云

謝判官

謝判官平原人竊元中嘗為曹州觀察推官視
事未幾一夕夢老父引之入大第中家頗豪盛

妳媼抱嬰兒飾以文繡指謂謝曰此君之後身也謝問此何郡復誰氏之家老父曰成都府陳郎中宅也貨產甚豐君心樂乎謝亦領之既寤甚不懌謂妻子曰吾其死矣日處致後事既而秩滿復調棣州判官到官數月又夢前老父復引至昔之第有小兒衣純綺戲階下指謂謝曰此前日之嬰兒也今姪五歲尚未語旣寤謂家人曰今日之事必不可免居常戚戚不怕考滿又將起調復夢老父導之入門見昔日之兒冠

緋帽紫袍銀帶立於堂庑顧謂謝曰此子已讀書矣若其謝我覺大惡之月餘病卒其子訥慶曆六年登進士第親說如此

劉觀察宅

京師保康門有劉觀察之別第每僦於人翰林學士曾布嘉祐丙申之冬以鄉貢將試禮部僦此第以居一夕不寐聞廳中有人呼曰太尉來既而又有若往來向訊切切細語或如傳授指令皆以太尉爲稱歷、可審甚訝之翌日究其

宅之坊曲地里則韓通之故第也通嘗為王彥昇族於斯第之下進士魏泰親得之於曾子宣云

柴氏枯橐

邢州城東十餘里周世宗之祖莊也門側有井上有大橐一株世宗時柯葉茂盛垂蔭一畝恭帝既禪橐遂枯死明道中枯卉復生一枝長一丈餘蔚然可愛井中水如覆錦綉柴氏懼遂塞井伐木明年詔求五代帝王之後柴氏自邢蔡

號等州諸族被甄敘入官者三十餘人并素之
祥亦非虛應

僧緣新

武陵郡西有佛廟曰栗園院主僧畜一犬幾十
年一夕夢犬語云累歲荷畜養之恩今當與堤
頭杜翁家為男故來奉辭僧既覺不以為意黎
明侍者以犬斃聞因大驚乃策杖至堤頭杜迎
門謂曰何出之早也延僧坐僧曰昨夕檀越家
豈有子孫之慶乎翁對以息婦夜生一男及詢

以何由而知僧遂以夢告翁亦駭異因許之為
浮屠令以披緇剪髮法名緣新鼎人率知之

括異志卷第五

括異志卷第六

襄國 張 師正 纂

王少保

少保王公明開寶八年乙亥拜秘書少監黃州刺史時王師問罪金陵公帥師入豫章市不易肆至戊寅歲受代徙傳舍有黃衣來謁延之坐乃曰公總兵入州洎解任不戮一人惠及物者大笑陰隲垂祐無彊袖中出一通青紙朱篆數幅曰他日舟至大孤山當有黃衣來謁必能識

之才出門即不見及至大孤山果有黃衣止
公大喜亟召見即以篆文示之乃曰請紙筆易
爲真字即烏犀丸方書畢而去公神其事遂依
方合之服者無不效盛太尉乃太保之孫女壻
得黃衣親書本盛疾作服之亦愈

范叅政

文正范公仲淹字希文天聖中以帖職通判陳
州時郡守以太夫人疾病召一道士俾奏章祈
祐築壇于正寢郡中召公預其事公竊笑曰庸

鄙小人安能達章帝所耶但郡守以太夫人之
故多方以圖安耳既而復謂道士曰仲淹將來
休咎可得知之否道士曰唯俟至天曹問之既
而秉簡贊章伏于壇自乙夜至四鼓凝然不動
試捫其體則殭矣殆五更手足微動遽扶坐於
床飲以茶藥良久謂郡守曰奉賀太夫人尚有
六年壽所苦不足憂也又謂公祿壽甚盛必入
政府郡守問今夕奏章何其久也道士曰方出
天闕遇放明年進士春榜觀者駢道不得出是

以稽留公益不以為然問曰狀元何姓曰姓王
二名下一字墨塗之旁注一字遠不可辨既而
郡守之母疾苦尋平明年春榜狀頭乃王拱壽
御筆改為拱辰公始歎道士之通神
事聞之
畢國傳仲達陳著作之方云

麥道錄

麥道錄本宦者嘗為入內供奉官勾當事材場
一日出西水門有丐者死於汴河岸之側有敗
席短杖時方大雪獨不積其身麥異之為市衫

禪麻屨故巾瘞之於隙地他日奉使鄜延至蒲坂北一郵置有一貧人詣門請見仍云嘗受恩故來致謝麥召見詢其由曰自頂至踵皆君所賜也麥固然良久方省瘞丐者事乃延坐與語屏左右移時而去麥既回京發瘞但見席杖而已麥遂棄官為道士為左街道錄年九十餘卒聞之于朱左藏允中

楊道人

楊道人者不知何許人也往來郢之京山縣豐

國范頓市中好與小兒戲狎雖大寒甚暑而未
嘗巾幘衣裳惟裸露而或以衣服贈之旋即施
與丐者故人尤惡視之徃々逆知人中心事復
州蘇繹寺丞得一燒朱砂銀法試之有驗徃見
之楊即前曰澁、酸朱砂燒盡水銀乾更不復
語又彭長官者欲求地葬其母以紙千之乞數
字直書云翻車二十五千既而果於翻車村得
其地以二十五貫市之熙寧癸丑歲辛子儀令
京山楊每來謂之贈以衫帽或留宿外齋雖設

倉榻密視之已安寢於地矣未幾索紙筆橫作
二畫自一二三四書訖授子儀諦視之乃四字
也果至四月而乃父棄世道塗商販皆云見其
死於數處矣而形狀不改熙寧七年卒於范頓
豪民張絳家為買棺埋于市側市民朱如玉方
客京師是日見楊來訪不交一言後朱自京師
回白縣聞其藏惟空棺耳其異迹甚多能記其
一二也 辛都官于京錄示

李芝

廣州新會縣道士李芝性和厚簡默居常若愚
者間為兩韻詩飄、非塵俗語常讀史傳善吐
納辟穀之術膚體不屢濯自然潔清髮有綠光
立則委地所居房室不施關鍵邑人崇向施與
金錢衣服無算人取去未嘗有言或召設祠醮
一夜有數處見者至和中多虎暴芝持策入山
月餘方出謂之曰已戒之矣自此虎暴亦息余
至和中親見之今則尸解矣

張白

張白字虛白自稱白雲子清河人性沉靜博學
能文兩舉進士不第會親喪乃泣而自謂曰祿
以養親今親不逮于祿何為遂辟穀不食以養
氣全神爲事道家之書無不研讀閑竄中南游
荆渚時鄉人韓可珏爲通守延納甚懽會朝廷
吊伐江吳軍府多事因褫儒服爲道士適武陵
寓龍興觀郡守劉公侍郎屏監兵張延福深加
禮重嘗以方鑑遺張曰收之可以辟邪白韜真
自晦日以沈湎爲事傲乎其不可得而親者往

往入廛市中多所詬罵切中人微隱之事衆皆
異之每遇風雪苦寒則必破冰深入安坐水中
永日方出衣襦沔濕氣如蒸炊指顧之間悉以
乾燥或與人為戲仰視正立令惡少數輩盡力
推曳畧不少偃又或仰卧舒一足令三四人舉
之衆但面頰其足不動居常飲崔氏酒肆崔未
嘗計其直家人每云此道士來則酒客輻湊嘗
題其壁云武陵溪畔崔家酒地上應無天上有
南來道士飲一斗卧在白雲深洞口自是沽者

尤倍南岳道士唐允升魏應時亦當時有道之士也慕其人常與之游白天才敏贍思如涌泉數日間賦武陵春色詩三百首皆以武陵春色裏為題一旦稱疾亟語觀主曰我固不起慎勿燔吾尸恐鄉親尋訪言訖而絕身體潤澤異香滿室傾城士女觀瞻累日為買棺葬於西門外逾年監兵罷歸其僕遇白於揚州開明橋問方鑑在否為我語汝郎斯鑑亦不久留僕歸具道張駭白渠死久矣汝何見耶尋索鑑熟視隨手

而碎又鼎之步奏官余安者以公事至揚州亦
遇白携大葫蘆貨藥亟召安飲于酒肆話武陵
舊遊數日安告行白曰爲我附書謝崔氏余歸
致書崔氏覽之大驚遽掘所埋棺已空矣白注
護命經窮極微旨又著指玄篇五七言雜詩唐
魏集而名爲丹臺並傳於時大抵神仙之事見
於傳記若白之解去此耳目相接年紀未甚遠
今室而祠之不惟衆所瞻仰抑將傳信於永世
也

斯皆柳應辰職方撰祠堂記畧云

靜長官

靜長官真定人登明經第寡嗜慾好道家修攝
事一旦棄妻子遊名山數年不歸天聖中先君
與親舊杜獲向知古會於磁州慕容太保之第
始然燭叩門頗急啓之乃靜也緼袍皂條布巾
芒屨把臂甚喜詢其所徃曰自別浪迹於山水
間良惟素志今將歸真定視妻孥聞諸君會此
故來相見旣飲靜曰方道舊為樂而酒薄不可
飲某有藥以資酒味於小囊中出藥一粒如彈

九投餅中復幕口良久飲之氣味極醇烈夜漏
上四鼓諸公皆酩酊就寢雜既鳴靜獨謂僕夫
曰或諸公睡起報云我且歸真定也既曉相與
歎靜藥之為神亟命健僕走真定向其家云未
嘗暫歸余前年寓洛下有醫助教靳襲者於其
家常惟一榻枕蓐甚潔人問其故曰以待靜長
官靜今隱嵩少間歲或一至或再至靳氏以神
仙事之嘗以方書授靳由是醫術大行家貲數
千萬靜今年逾百歲狀貌止如四五十人洛人

多知之

率子廉

衡嶽道士率子廉落魄無他能嗜酒性狠悖於
事多不通易辱人以言人亦少與之接故以牛
呼焉居山之魏閣景甚幽邃而子廉慵惰致蕪
穢委積而弗加芟掃以是景趣湮沒閣宇圯壞
游者以其境汚人陋亦罕到焉故禮部侍郎王
公祐以中書舍人守潭州立夏將命祀祝融至
衡岳遊覽佛寺道廟殆遍因訪所謂魏閣者群

道士告以推陋無足觀而王公堅欲一視及至則子廉猶醉寢王公入其室左右呼索之而子廉醒未解徐下榻拭目瞪視王公久之乃曰窮山道士遇酒即醉幸公不以為罪左右皆股慄而王公欣然無忤其應答之言雖甚俚野而氣貌自若王公異之遂載與還郡日與之飲酒所以顧待之甚渥人亦莫諭何以致然也間辭歸山復止魏閣者又半年然王公問遺時、至山復作詩二章寄之一日忽謂人曰我將遠行當

一別舍人即日扁舟下潭謁王公且曰將有所適先來告別公曰往何地則曰未有所止緣某一念所詣則翩然遂行恐爾時不復得別故預耳王公留與之飲居二日辭歸魏閣至之日以書別衡山觀主李公盥浴飾服焚香秉簡即中堂而蛻去聞者驚異李為買棺厚葬之殆半歲有衡岳寺僧自京至於安上門外見子廉云來看京師即還時蒙李觀主厚有贐行懷中出一書附僧為謝李發其封真子廉之書也人皆嘆

王公之默識

張都官子諱言

許偏頭

成都府畫師許偏頭者忘其名善傳神開畫肆於觀街一日有貧人弊衣憔悴約四十許負布囊詣許求傳神許笑曰君容狀若此而求傳神得非有所稟而召僕也邪曰非也聞君筆妙故來耳幸無見鄙即解布囊出黃道服一襲又出一鹿皮冠白玉簪遂頂矣引其鬚應手而黑且長矣乃一美丈夫也許大驚謝曰不知神仙降

臨前言戲瀆誠負媿惕道人笑曰君可傳吾像
置肆中後當有識者或求售者止取一千錢不
可逾也許如命寫訖未及語携囊而出許拜謝
已不見許遂陳所傳像於肆有識之者曰此靈
泉朱真人也求售者日十數許家貲遂日益後
以貪直盡且不給每像輒云二千是夕夢道人
謂曰汝福有限吾嘗戒汝不可妄取厚直安得
忽吾言促其壽也遂掌其左頰既寤頭遂偏自
是呼爲許偏頭慶曆中許年八十餘方卒朱真

人者乃朱居士

也見唐書列傳杜光庭列

仙傳

事得之裴長官公愿云

張翰

張翰江陵人業進士其父前妻生三子而亡父
再娶竇氏翰竇出也竇之生歲月日時不利於
夫遂減歲遷就吉辰而歸於張氏間與厥夫禱
嗣於歸真觀之三清殿祝辭以所減之齒皆焉
繼育數子而翰父物故會歸真觀火竇密以鏹
五十萬與道士僦殿宇少時竇亦死後數歲翰

忽爲神所憑以手執髻鞠躬曰聽聖語竇氏以
詐僞之歲誣罔上真又弗詢於子私用家貲已
受考于陰府今則爲異類矣事皆秘密衆所不
知者如是不一繇是荆人率聞之噫女子增減
其年以利適人者爲過雖小妄以告神則罪大
也專取家帑以用構祠堂不俾子知神尚責怒
矧非理而用者乎

括異志卷第六